

# In festival cun bia glied cuntenza e legra

Ver 1000 affons e giuvenils da tuttas regiuns linguisticas dalla Svizra han cantau a Mustér

DA HANS HUONDER / ANR

■ **D'Anceinza entochen la ier ha il tschunavel Festival da chors d'affons e giuvenils dalla Svizra giu liug a Mustér. Ver 1000 cantaduras e cantadurs han delectau in vast publicum ton cun lur producziuns el center da sport e cultura sco era en auters loghens. Ils organisaturs tilan ina bilanza fetg positiva da quei eveniment naziunal.** Cun concerts finals ei il tschunavel festival ius a fin la ier da mezdi a Mustér. Duront quater dis ha il publicum gudiu biaras presentaziuns dils 36 chors participonts. Quels ein denton buca mo stai da veser ed udir, mobein ein era stai engaschai en luvratris. Igl ei stau in arranschament d'ina dimensiun nunusitada e d'ina variasiun fascinonta. Cun bialas regurdientschas vegnan ils chors a returnar a casa e bialas regurdientschas vegnan era ad accumpignar il publicum ed ils organisaturs. L'impurtonza dil festival ei vegnida suttrahada la sonda dalla preschientscha da cussegliera federala *Eveline Widmer-Schlumpf* e dil president dalla regenza grischuna *Martin Jäger*.

## Grond program

Tgi che ha vuliu veser ed udir ils chors duront quels quater dis ha giu biaras caschuns leutier. Ils chors ein sepresentai els concerts el center da sport e cultura, mo era en baselgias e capluttas e leutier sin piazzas publicas. Las formaziuns derivontas da tuttas regiuns linguisticas dalla Svizra han denton era embelliu survetschs divins. Igl interess per ils concerts e las producziuns sin piazzas publicas ei staus fetg grond. Differentas gadas ein la baselgia parochiala e la baselgia claustrala stadadas pleinas. Mo era la fascinaziun per ils concerts en baselgias pli pintgas e sin las piazzas publicas ei stada gronda. La qualitad musicala da quels chors ei stada per gronda part sin in fetg ault nivel, gie schizun pli aulta ch'avon dus onns a S. Gagl. Quei constatescha il president dalla cumissiun da musica dil festival, *Chris-*



Il plascher dils affons e giuvenils pil cant ei staus nunsurveseivels.

FOTO H. HUONDER

*tian Klucker*: «Cheu ein ils meglers chors d'affons e giuvenils separticipai. Pli impurtonza che la qualitad ei denton la participaziun stada, il plascher da cantar.»

## Neginas bands

En cumparegliaziun cun il festival d'avon dus onns a S. Gagl constatescha *Christian Klucker* oravontut ina differenza: «Avon dus onns ei mintg' auter chor sepresentaus comunablamain cun ina band. Quella ga gnanc in sulet. Eventualmein ei quei in trend, ei sa denton era esser ch'igl ei stau memia bia bands tschella ga al festival.»

Probablamain ha quei denton era da far cun l'elecziun dallas localitads quella ga a Mustér. «Ils chors han cantau cheu savens en baselgias e capluttas. Cheutras han els vuliu dar dapli peisa al tun ed alla melodia», manegia *Christian Klucker*. El e la presidenta dil comite d'organisasiun, *Flavia Walder-Hublard*, ein satisfatgs cumplesnamein da quei festival: «Naven digl emprem mument – pia cura ch'els chors ein arrivai a Mustér – havein nus giu ina grondiusa atmosfera. Gnanc la schliata aura dil venderdis ha giu in effect negativ sin quei festival.» Il plascher da saver se-

participar ad in tal arranschament naziunal ei staus screts en fatscha als affons e giuvenils. Il menaschi sco tal ha funcziunau senza pli gronds incaps. «Jeu saiel trer ina bilanza trasatras positiva. Igl ei stau super. Ils chors e lur dirigentas e dirigents han schau plascher nosa purschida e leutier ei il grond engaschament da tut ils gidonters e voluntaris vegnius. Donn che tut ei gia finiu», puntuescha *Flavia Walder-Hublard*. A S. Gagl ein 1500 affons e giuvenils separticipai al festival, a Mustér 1000. «Nus havein stuiu limitar il diember. 1500 fuss stau per nus damemia, sur-

tut per motivs da plaz», declara la presidenta dil comite d'organisasiun. In laud ha ella era per la populaziun: «Nus havein saviu sefidar da tut quels ch'ei sedeclarai prompts da segidar, mo era igl auditori ei staus plein fiug. Las baselgias ein stadadas per gronda pleinas duront tut ils concerts.» In element essenzial dil festival ei la claustra stada per *Flavia Walder-Hublard*: «Dad ina vart ei quei la baselgia claustrala, dall' autra vart la cuschina dalla claustra che ha procurau il proviant per tuts.»

## Chorical cun 36 chors

Il punct culminont dil festival ei il Chorical cul tetel «La melodia absoluta» staus. La sonda sera ein tuts 36 chors participonts al festival sepresentai comunablamain ella halla plurivalenta. Vid la cumposiziun da quei toc han differentas persunas cooperau: *Christian Klucker, Ludger Nowak, Felix Benesch, Sara Gmür e Betty la Gachette*. All'entschatta da quei toc ei l'idea d'ina ovra comunabla stada: Mintga chor separticipescha ed ei aschia ina part dil puzzle che sedat la fin finala la sonda sera alla presentaziun el center da sport e cultura. Ton per ils affons e giuvenils sco per las dirigentas ed ils dirigents eis ei stau in experiment, pertgei negin che saveva per propi sch'el reusseschi la fin finala era. Ina partitura cun varga 200 paginas cun canzuns e texts en tuts quater lungatgs naziunals, cant el chor e solo, clavazin e percussiun e leutier scenas giugadas. La pintga e svegliada Ursina fa in viadi atras las Alps comunablamain cun professor *Derendinger* ch'ei disoccupaus. Il viadi meina els millennis. Els anflan la melodia absoluta. Accumpignai ein els vegni da 1000 vuschs. L'emprema emprova comunabla da quei toc ei era stada la davosa – aschidadir la premiera e derniera il medem mument. Ils dirigents han capiu da fascinar ils affons e giuvenils per quei spitchel. La fin finala ha negin pli vuliu calar da cantar. In supplement ei suandaus l'auter.

## Passape atras il quartier da S. Clau a Glion è avert

■ (rtr) 36 onns pli tard è l'idea finalmain daventada realitad. Ussa pon ils peduns ir atras il quartier senza stuair ir sin via. Ina via fitg privlusa, stretga e cun bler traffic. Grazia a quest passape duess il quartier da S. Clau vegnir pli attractiv per fatschentas u era sco quartier per abitar. Il davos toc dal passape ha custà radund 100 000 francs. 2/3 dals custs surpiglia la vischnanca da Ilanz/Glion, 1/3 in manader da fatschenta che ha sia fatschenta a


S. Clau. Cun ina pitschna cerimonia d'avertura è il davos toc dal passape tras il quartier S. Clau vegni inaugurà. Suentter la benedicziun entras sr. *Herta Handschin* da la claustra da Glion han representants dals iniziants taglià la fascha cotschna ed avert uschia uffizialmain il passape. Ils vischins han festevà l'avertura cun ina festa da quartier che ha gi lieu sin la via atras il quartier, ch'è vegnida serrada a posta per la festa.

## La muntada dalla claustra per la Surselva

■ (anr) Dacuort ha igl avat dalla claustra da Mustér visitau *Tarcisi Venzin* a Dardin. Il spiritual en pensiu ha mussau a *Vigeli Monn* entgens scazis dalla vischnanca da Breil, denter auter la caplutta s. Clau al pei dil Grep da Plaid. Cun quella caschun han ils umens risdau dalla muntada dalla claustra da Mustér per la regiun. Culla muntada actuala dalla claustra per la Surselva ein era *Roland Scherer* e *Ralph Lehner* digl institut pil

management systemic dalla Universitad S. Gagl sefatschentai dacuort e constatau che la claustra hagi bia potenzial buca nezegiau. La muntada dalla claustra da Mustér ei denton buca da maniera economica, mobein da maniera spirituala. *Tarcisi Venzin* ha envidau igl avat *Vigeli Monn* ad ina scuntrada da quei tema a Breil. La scuntrada ha liug ils 29 da matg allas 19.00 el Hotel Kistenpass. Envidai ein in e scadin.

RECLAMA



LA QUOTIDIANA